

ՀՀ Արմավիրի մարզպետ Էդվարդ Յովհաննիսյանի շնորհավորանքի խոսքը Հանրապետության տոնի առթիվ

28.05.2022

Արմավիրի մարզի հարգելի բնակիչներ, սիրելի հայրենակիցներ, Մեծ հպարտությամբ և լավագույն ցանկություններով շնորհավորում եմ բոլորիս Մայիսի 28-ի՝ Հանրապետության տոնի կապակցությամբ:

Հայ ժողովուրդը մշտապես արժևորել է 1918 թվականի պատմական իրադարձությունները՝ Սարդարապատի, Բաշ-Ապարանի, Ղարաքիլիսայի փառահեղ հերոսամարտերը և Առաջին Հանրապետության ծնունդը, ոգեկոչել ճակատագրական հաղթանակները կերտած հերոսներին: Եվ հենց այդ բախտորոշ իրողությունն է, որ հայկական պետական մտածողության, հայապահպանության և ազգի ամրապնդման հիմք է դրել:

Մայիսյան հաղթանակներով հայ ժողովուրդը վերանվաճել է իր դարավոր երազանքին տեր կանգնելու իրավունքը, անկախ պետություն ունենալու պատիվն ու պատասխանատվությունը: Եվ մենք դա արել ենք մենակ, ավելին՝ մենք դա արել ենք ի հեճուկս ճակատագրի հարվածների:

Ուստի, մեր մեջ կրելով Մայիսի 28-ի խորհուրդն ու պատմական նշանակությունը՝ մենք երբեք չպետք է վիատվենք մեր պետության կայացման բարդ ու դժվարին գործում: Պետք է լինենք միասնական և համախմբված հայրենանվեր գաղափարների շուրջ՝ մեր պետությունը զարգացման նոր ուղու վրա դնելու համար:

Կրկին շնորհավորելով բոլորիս Հանրապետության տոնի կապակցությամբ՝ մեզ մեծ ուժ ու եռանդ, մեր երկրին խաղաղություն ու վերելք եմ ցանկանում:

Փառք մայիսյան հերոսամարտը կերտած հայ ժողովրդին, Փառք Հայաստանի Հանրապետությանը: